

石

匱

書

石渠書卷第十二

穆宗本紀

莊帝 世宗第三子也母杜太后帝辟盤之日
首取龍旂畫鼓及五行志每取輒進 世宗世
宗奇之長而丰神秀朗舉止端莊見者謂有帝
王之度始封裕王與莊敬太子同日受冊中官
誤送太子冊寶於帝所而裕王冊寶乃在太子
宮是時莊敬已屬疾竟薨中外曰天所啟也

世宗而立太子皆堯其後春味高益惡言立儲
事諸方士有言於世宗者曰二龍不相見於
是帝仍為王出居邸者十餘年絕不得召入中
外莫測屢有言者然而世宗意固自定世
宗末年海瑞上疏切直上私命錦衣母死之
世宗崩乃入踐太子位焉是為嘉靖四十五年
十二月壬子頒詔以明年為隆慶元年大赦天
下釋海瑞於獄元年正月冊陳氏為皇后李氏

為貴妃吏部奏請卹錄先朝建言得罪諸臣生
者宜遵詔錄用戮死者應復賧贈蔭諭祭從之
詔下方士王金等獄論死嚴黨鄒懋卿成邊奪
故真人邵元節陶仲文誥命仆仲文墓碑燬大
內齋醮宮殿上孝慈皇后尊謚曰開聖皇太皇
后陞兵部主事海瑞為尚寶丞禮部尚書高儀
請冊立皇太子 上諭皇子尚幼先賜名而後
冊立追贈故新建伯王守仁為侯謚文成周尚

文為太傅謚武襄二月贈刑部尚書鄭曉為太
子少保謚端簡奪尚書徐杲官及其子錦衣世
職尋謫戍三月封皇親杜繼宗李銘為伯馬芳
破國於宣大戰於威寧再戰於黑山斬首九百
餘級許群臣嫡母在得贈生母量釋高牆庶人
四月重錄永樂大典書成修 世宗實錄六月
九卿科道連章劾閣臣高拱寺丞何以尚請尚
方紉新拱頭拱因謝病求去許之七月賜楊繼

盛謚忠愍蔭一子應尾入監讀書原任山東副
使王世貞上書訟父忤冤詔復忤原貳傳諭聖
駕十二日幸藩邸高儀恐以巡幸開游逸端䟽
請停止科臣何起鳴王好問各䟽諫不從朝鮮
使者請留觀幸學許之八月科臣吳時來薦談
綸戚繼光宜督練邊兵從之上幸太學祭酒
司業坐講如儀御史耿定向請南畿鄉試監生
去皿字編號是科監生中式不及額遮典試王

希烈孫鉦道政之詔刑部查名坐戍後復編號
如初上欲詣天壽山行祔祭禮徐階諫止之
遣大學士陳以勤祭先師孔子九月御史龐尚
鵬劾內閣郭朴無相臣體乞致仕去大學士徐
階請罷提督團營內使從之十月鹵寇薊州殺
叅將吳昂黃台吉寇偏頭關上怒命逮繫鎮
巡劉燾王之誥副叅田世威等訊治命閤部與
文武臣案商禦邊策以聞召戚繼光入京協理

戎政科臣陳瓚追論楊順侵盜邊儲及與路楷
搆殺沈鍊謫戍未足盡辜鍊子襄亦為父訟寬
乃復逮順楷下獄訊楷論斬順死獄中科臣魏
時亮請祀薛瑄陳獻章王守仁於孔廟下部議
十一月 上親幸南郊行大祀禮封李肱為朝
鮮國王十二月鄭王厚烷以嘉靖中諫事立削
爵錮高牆至是復國加祿米是歲減免天下田
糧九百九萬八千六百九石有奇

二年正月亨太廟正一人張永緒失職死詔
停止一真人封號奪其印止以裔孫張國祥為
上清觀提點講官趙貞吉遷南京禮部尚書時
貞吉年六十餘議論侃々上手詔諭輔臣調
吏部侍郎林燠代之而留貞吉講筵太監李芳
請裁損近年所加粳米四千五百石青鹽三萬
斤允之科臣石星疏六事上怒命廷杖六十
黜為民二月上耕籍田大祀天地于南郊駕

詣天壽山謁諸陵三月冊立皇太子五月陝西
民李良雨變為婦人六月王時舉王之垣各疏
乞正位中宮以端治本 上曰后多病移居別
宮病愈即還宮汝不知內庭事無多言七月徐
階上疏乞休許之十月內降取買真珠黃綠玉
等項戶部尚書劉體乾執持不行予閒位十一
月太監李芳屢以直言忤旨杖八十送刑部候
決尚書毛愷言刑人於市與衆共之非特使死

者不寬亦令生者不犯芳供事內廷罪狀未明
莫知所坐 上曰芳無禮第錮之十二月廢遼
王憲惲是歲免天下存留田糧二百三十四萬
九千三百有奇

三年正月總理練兵都督戚繼光條陳練兵事
宜兵部請取回總兵郭琥獨任繼光詔從之高
儀疏請東宮出閣講學 上曰待十二齡來說
二月 上免喪猶不親政吳時來上保泰九劄

不報總督譚綸築荊州昌平墩臺四百七十二
座三月土星逆行犯太微垣上將星五月御史
詹仰庇言 陛下取戶部銀盡以供造鰲山修
理宮苑花欄龍鳳鞦韆架傳造監櫃玉盆諸費
使群小因而乾沒為聖德累不小 上怒命錦
衣衛杖百為民淮揚徐大水奏聞勸借貸穀十
五萬石截漕三萬石以賑之六月以海瑞為右
僉都御史巡撫應天八月釋原任副總兵田世

威叅將劉寶於獄令立功自贖九月 上大閱
將士于京營教場十一月尚寶司丞鄭履淳上
疏勸 上用賢納諫廷杖一百下詔獄十二月
起大學士高拱入閣兼掌吏部

四年正月陳以勤乞骸骨歸許之二月大學士
趙貞吉兼掌都察院王俊民唐樞以議禮得罪
援登極詔復戍廕子高拱謂前閣臣階歸過先
帝以行己私是教天下以逆不可 上詔曰大

禮斷自皇考諫者本屬有罪今不加甄別盡行
卹錄何以仰慰在天自後有借例市恩歸過先
帝者重論不宥高拱復請兵部添設侍郎二員
諳練兵務或遇巡邊員缺即便差往於軍務有
濟上褒嘉如議行四月刑科舒化以審覈請
釋繫獄司丞鄭履淳內官李芳等詔釋履淳為
民芳等充南京淨軍五月承運庫太監崔敏請
年例金寶戶部執奏停止不允科臣李己陳五

德切諫 上怒挾一百繫獄黜五德為民俺答
孫把漢那吉與俺酋有却挾其妻闌入遼總督
王崇古留之俺酋婦鍾愛此孫願執叛人趙全
等請款因擁衆至遼崇古諭以存卹恩而要其
縛叛示信酋婦感且媿曰漢乃肯全吾孫吾且
嚙辭盟世服屬無貳奚有於叛人遂訂盟通貢
市焉于是俺答款塞縛叛人獻闕下誅之封俺
酋為順義王諸下皆解辦受封比屬國崇古以

款尚功加少保兵部尚書世錦衣十戶飲至告
廟群臣遷賞如例御史張守約追論故錦衣都
督陸炳罪籍其家八月刑科給事中舒化等請
釋戶科給事李己內犯張思等分別情罪得旨
己釋為民思等繫獄如故

五年二月許天下朝覲官謁見皇太子於文華
左門五月敘廣西古田平寇功督撫李遷殷正
茂總兵官俞大猷各陞賞有差八月詔以故禮

部左侍郎薛瑄從祀孔子廟庭其神主序于先
儒呂祖謙之下十月命盜決徐邳上下河防者
如決河南山東河之罪貴州土舍安國亨來降
十二月女直窺遼東搃兵李成梁等大破之
上御門宣捷受賀

六年正月皇太子行剋禮閣二月 上出御皇
極門疾作還宮 上疾有瘳三月皇太子出閣
講書四月浙江黑青見五月南直隸龍目井化

為酒上不豫二十五日召閣臣高拱張居正
高儀至乾清宮受顧命上倚坐御榻后及皇
貴妃咸侍東宮立于左拱等跪于御榻下命宣
顧命曰朕嗣祖宗大統六年偶得此疾遽不能
起有負先皇付託東宮幼小朕今付之卿等
宜協心輔佐遵守祖訓保固皇圖拱哭奏曰臣
死皇上厚恩誓以身報東宮雖幼祖宗法度
具在臣務竭忠輔佐不敢愛死且奏且哭大慟

不止兩宮亦失聲二內臣扶拱起遂長號以出
異日 上崩是夕中官馳至內閣議垂簾事閣
臣高儀正色言曰我祖宗以來無比制中官沮
塞而入六月上尊號曰莊皇帝廟號曰穆宗九
月葬昭陵

石匱書曰以 肅皇帝之英斷在位四十五年
綜核寓內蓋亦百廢具舉矣在後人祇應守成
不更納天下於休和焉故 穆宗垂拱六年無

所事、如漢之惠文無以異也諸臣受釐宣室
止言溫樹可臻治平矣使於此際尚事更張思
變成法曹參有言陛下自察聖武孰與高帝觀
臣能孰與蕭何賢邪

后漢書卷第十三

神宗本紀

神宗顯皇帝 穆宗長子也母李太后隆慶二年三月冊立皇太子太子甫六歲敏睿不凡一日遇閣臣於御道曰先生良苦翊贊輔臣頓首謝曰願殿下勤學答曰方讀三字經應答暇豫康音清朗輔臣悚悅

六年六月 穆宗宴駕太子即皇帝位詔以明

年為萬曆元年大赦天下時閣臣高拱當國有
內使傳旨拱叱曰旨出何人 上冲年皆若曹
所為吾逐若曹必盡始已乃命御史程文駿連
等劾馮保等欲盡出之保按其奏俟張居正視
陵歸遂召成國公內閣六部至會極門宣旨責
拱專擅無人臣禮勒令致仕拱伏地不能起居
正掖之出翌日踉蹌僦騾車出都上兩宮尊號
陳太后曰仁聖皇太后李太后曰慈聖皇太后

上御平臺召張居正坐前曰先生為 父皇
陵寢勞苦又曰 父皇簡先生輔朕既受顧命
當悉心匡扶居正頓首泣謝曰今國家要務惟
在遵守舊制不必紛更至於講學親賢愛民節
用又君道所先乞聖明留意 上曰善賜銀幣
出 上少年英察 穆宗恭妃遣內使以金壺
進其家為門者所訶 上召內使三十以百金
遺妃曰妃家貧以此給賜 先帝賜器不可出

也張居正請上御日講三日一視朝勿以寒暑小故罷廢兼請酌定朝講日期詔曰朕方在諒陰哀慕深切日臨朝政心實未安今後除大禮大節并朔望升殿及遇有大事不時召大臣諮問外其常期每月定以三六九日御門聽政餘日俱免朝叅十二月張居正進帝鑑圖說上嘉納之

元年癸酉正月御史李願請祀布衣胡居仁於

孔廟兩廡二月嶺東惠州盜藍一清據洋烏潭
馬公等寨為寇巡撫御史殷正茂討平之九月
輔臣講宋仁宗不喜珠飾上曰國寶惟賢珠
玉何益因述中宮好裝飾朕每事抑之居正頓
首稱善上又言秦始皇銷兵木挺何嘗不殺
人居正曰一二戍卒便能亡天下所以可畏惟
民上曰然居正柄政上寵遇隆渥日侍講筵
諸官出就直廬召居正入於文華殿後張小幄

造膝密語正字官皆走避言已方入一日在直
廬感病上親調椒湯賜之隆冬進講以片種
鋪地使居正立時溫足十日有客星經天御史
胡濤上疏請放宮人內有唐高不道則天虐之
語觸慈聖怒削籍為給事中李己論救并黜之
翰林院脩撰張元忭論救且請太后於宮中講
列女傳不報

二年甲戌正月蒙古三貢禮成加王崇古太保

西南角都蠻獫狁古瀘戎地出沒為寇總督魯省
吾討平之六月翰林院產白燕內閣生嘉蓮閣
臣等進獻聖母中宮馮保謂輔臣曰主上冲
年不可以異物啟其好上遂以白燕送出

穆宗實錄成十月命明年元夕罷烟火鰲山十
二月輔臣張居正率吏部尚書張瀚兵部尚書
詠綸進御屏：中畫天下疆域上粘文武百職
姓名上命設于文華殿後省覽

三年乙亥正月武清伯李偉請價造坟工部尚書郭賓議折銀二萬兩上嫌其薄張居正曰孝在無違當節之以禮貴戒之家不患不富患不知節越分之思非所以厚之也上從之十

一月御史傳應禎上疏引不足之說以譴居正四年丙子正月六日上御文華殿謂居正曰應禎以三不足之說誣朕予廷杖先生何不肯居正對曰應禎狂悖妄言死有餘辜但朝廷待

言官當存軀 上曰先生不要避怨居正曰臣
受 皇上厚恩捐糜難報何敢避怨 上曰科
道官何以甲救居正曰此皆故套 上曰跪中
言應禎有八十老父即取登科錄視之有母無
父何謂不欺居正又甲解一二語 上乃霽顏
御史劉臺劾奏居正專擅威福引用張四維張
翰為植黨居正甚怒見 上辭政伏地不肯起
上為下御座手掖之詔下臺獄廷杖逮成居正

疏辭免校奪職還里二月逢東總兵戚繼光脩
三屯營城五月重脩大明會典七月夏麥不登
又多水旱上賜民田租詔責有司加意牧養十
月山東巡撫都御史奏昌邑令居官貪鄙竊取
帑金上曰此人乃進士何無耻如此居正曰
惟恃進士故敢放肆皇上惟當攷其功能不
必拘以資格若不要錢者雖異途下僚亦當顯
擢如貪賊壞法即高第貴遊亦當重處上曰

善

五年丁丑復龍帟山提點張國祥真人召號給
還金印五月詔脩慈慶慈寧兩宮張居正言兩
宮規制甚備又極壯麗足以娛聖母萬壽不宜
更改上入告聖母得罷役六月嶺南巡撫都
御史凌雲翼部署官兵號二十萬征羅旁克木
齊山破其岩峒拓地數百餘里請置郡縣八月
世宗寢錄成上奉聖母懿旨今歲大喜暫免

行刑居正執奏不可 上曰聖母奉佛故不忍
耳后正奏曰佛氏所稱地獄刀山劍樹剉燒春
磨其慘更甚于行刑 上大笑諭止勿停九月
張居正喪父 上手諭宣慰遣官賜賻又命司
禮監差官同居正子嗣脩馳驛營葺事完日迎
母侍養居正屢疏守制不允乃乞暫違諭旨辭
俸在官守制從之十月朔彗星見斗牛間其尾
指婺女長數十丈大內火編脩吳中行檢討趙

用賢刑部員外艾穆主事沈思孝合嗣上疏言
張居正忌親貪位居正大怒四人同日受杖刑
部觀政進士鄒元標至午門親視四人杖畢持
疏復上次日杖八十謫戍貴州都勻衛

六年戊寅正月禮官請舉大婚詔首輔張居正
充納采問名使戶科給事中李洙疏言張居正
出服不宜預告事請改命不允上行冠禮三月
大婚禮成上兩宮徽號仁聖皇太后加懿安慈

聖皇太后加昭文張居正請假歸葬父之摠兵
李成梁報遼東大捷六月張居正奉旨還朝
上遣中使郊迎居正入朝凡見文華殿西室
上問沿途所見稼穡民情與邊疆守戍諸事款
語良久乃予休沐十日十二月宗藩要例書成
頒示宗室諸王府

七年乙卯正月毀天下書院二月河工成四月
詔停鑄大錢五月工科都給事中王道成等奏

言蘇松大水請酌減織造段疋 上諭減半七
月張居正查萬曆七年以前帶徵錢糧悉行赦
免 上允行之

八年庚辰三月 上躬耕籍田設專官纂脩會
典九月彗星見西方紀天市垣太白晝見又有
客星赤如火見東方二十七日未時星月皆見
上露禱宮中加意脩省先是傳旨選女子二百
人充六宮以天變罷之宦者李貴朱鳳侍慈聖

太后 上患之一日乘酒呼貴鳳以佩刀擊之
幾斃太后怒甚 上請罪以居正言亦出其近
侍孫海客用輩五人以謝十一月詔度民田張
居正請申勅強宗勢要無放阻撓以故莊田屯
田民田職田養廬田蕩地牧地皆就彊理無有
隱匿十二月張居正纂累朝寶訓四十四款進
呈 上嘉納之

九年辛巳正月朔日烈風竟日無光首輔張居

正請令翰林院官分番入直應和文章或令侍
上請譙實問經義陳說治理如唐宋故事四月
文華殿右宣勤門限下石砌有天下太平四字
甚明顯中官以為天瑞聞于上駕出視顧左
右曰試鑿之如真入石數寸石工鑿之未及分
而字滅上御經筵出南京給事中傅作舟告
荒疏問曰淮鳳頻年告災何也居正對曰此地
方多荒少熟即如訓錄中所載元末之亂亦起

於此今當破格賑之得允 上大閱張居正請
存問原任少師除階以彰優禮耆碩舊典九月
諭停刑十一月張居正十二載考績加上柱國
太傅支伯爵祿居正疏辭上柱國止加太傅閣
臣之領三公始此

十年壬午正月順義王俺答死 上嘉其款貢
年久恭順不渝特賜祭賻四月佳亂定淞江兵
亂民亂進右都御史兼兵部左侍郎五月 上

以端陽節命為龍舟戲既治具彗星見西北
上曰天教也其亟己六月朔日食三日彗出五
車口柱星以南首輔張居正卒于京贈上柱國
謚文忠遣官諭祭護其喪歸八月皇第一子生
詔赦天下是年王果既誅其子阿台叛勾連蒙
古數掠孤山鐵領李成梁動兵出塞大破之
十一年癸未三月上西宮徽號仁聖上加康靖
慈聖。上加明肅六月浙江巡撫都御史張佳

胤奏請減織造以寬民力從之八月上躬祀
山陵十月慈寧宮火御史李植叅馮保十二罪
上執保於禁中御史江東之亦疏論保罪狀因
謫保奉御居南京籍其家十一月都御史李松
與李成梁計服海西

十二年甲申四月御史羊可立追論故輔張居
正罪惡詔奪居正官及謫籍其家刑部主事董
基諫內操謫邊方八月定從祀學宮真儒王守

仁陳獻章胡居仁九月順義王黃台吉死子杜力克襲

十三年乙酉四月御史鄧諫請停止燒造磁器從之時四方旱暵上步行祈禱詔免天下災傷地方田租一年六月慈寧宮成命擇中秋吉日奉迎聖母還御新宮七月封杜力克為順義王哈屯比妓為忠順夫人八月起海瑞為南京右都御史

十四年丙戌正月皇第三子生進其母鄭氏為
貴妃刑部主事孫如法奏恭妃誕育元子五年
未聞進封鄭一生子即封貴妃何以釋天下之
疑請並進二妃則群疑定上怒降邊職二月
輔臣申時行請冊立東宮科臣姜應麟沈璟亦
具疏請上怒謫之六月畿內大饑七月水旱
異常閣臣請急安撫流移禁輯攘奪十月南太
常寺卿沈子木疏言建文皇帝御宇四年不

得一孟麥飯下同齊民于誼不忍且文皇帝
常命以天子禮葬矣近奉明詔襲表死事諸臣
皆祀而建文獨不祀於德意未稱宜詔禮官定
議或專祀或祔食懿文太子之側不允

十五年丁亥正月申時行等請並舉建儲封王
吉典二月重脩大明會典成十月鄭陽兵變守
備三鳴鶴討定之十二月那林孛羅引蒙古悅
忽太等萬餘騎急攻把大寨我兵往援圍解南

京都御史海瑞卒詔贈太子少保謚忠介

十六年戊子 上御經筵覽貞觀政要曰唐太

宗多有慙德魏徵大節有虧命以後講禮記其

貞觀政要停勿講三月國子監司業王祖嫡請

復建文年號改正景皇帝實錄下閣臣議申時

行奏建文復號未敢輕議遂寢九月禮部郎中

高桂論順天主試黃洪憲舉子鄭國望稿止五

篇首名王衡係輔臣王錫爵子素號多才疑信

相半李鴻係申時行壻內有關節因字詔禮部
覆試御史馬象乾劾東廠張鯨亮惡并指輔臣
王錫爵阿從失職上怒下鎮撫司問十二月
給事中李沂復劾張鯨上怒廷杖六十革職
為民

十七年己丑正月劉汝國自稱順天安民王橫
行斬黃間白晝張蓋入縣治開倉廩取富民粟
散給饑民官兵逐之往敗於都御史周繼以

聞調吳楚兵大敗之生擒汝國寇遂平二月覆
試舉子王衡等八人俱准會試奪高桂俸四月
王錫爵請視朝建儲大理寺評事雖于仁疏進
酒色財氣四勿藥箴上惡之斥為民十二月
四川播州宣慰司使楊應龍所部何思宋世臣
上變告應龍反詔黔蜀兩省會勘是年慈谿縣
有紅血從艸湧出約有八處大如盆面高有一
尺血腥濺船上船即出血濺入人足亦出血

約半時方止

十八年庚寅六月北鹵寇陝西大帥劉成嗣禦
之不勝鹵遂入犯洮河副將李聯芳戰歿以戎
政尚書鄭洛為七邊經畧使切責順義趣之東
歸而聲火酋之罪草具市賞逐之遠去西邊以
安九月詔停刑十月兩京九卿科道合詞懇請
冊立東宮上諭冊立事科道等官不瀆操便
于明年冬舉行十一月十九日聖母萬壽上

出臨受賀詔先朝兵部尚書于肅愍諡改諡忠肅

十九年辛卯三月孛星見西北方有胃宿度分尾長尺餘己而在東北方室壁宿度分尾長二尺次輔玉錫爵給假歸省八月太白經天

二十年壬辰二月西夏唃廝囉承恩作亂命都御史魏學曾督師討之五月倭酋關白平秀吉襲破朝鮮朝鮮王李昫倉卒棄王京奔平壤請

援廷議先發游擊史儒防義州遼遼陽副總兵
祖承訓統兵三千渡鴨綠江援之七月祖承訓
兵至平壤敗績史儒死之兵部尚書石星使募
客沈惟敬往倭宣諭惟敬抵平壤歸報秀吉願
入朝與朝鮮並為外藩星以聞加惟敬游擊往
諭倭撤兵歸島以兵部侍郎宋應昌為東征經
略主事劉黃裳袁黃為畫八月上念寧夏師
老無功罷提督魏學曾以葉夢熊代之九月三

日大將軍李如松平寧夏哮拜闔室自焚生得
拜子承寵侄承恩等獻俘京師十一月上御
門受賀詔承恩極刑承寵等駢斬長安市頒示
天下及四裔君長詔慰慶王復寧夏今年田租
十二月以李如松為東征提督如松至軍大會
文武將吏誓師渡江是月蜀撫逮楊應龍詣重
慶對簿法當斬應龍請征倭自效乃舍之

二十一年癸巳正月李如松平壤大捷朝鮮四

道並復王歸平壤如松駐師開城是月輔臣王
錫爵還朝上密疏上傳諭三皇子並封為王
以待將來有嫡立嫡無嫡立長工部郎中岳元
聲儀制司郎中顧允成張納陞合疏爭之刑科
給事中王如堅光祿丞朱維京疏繼上上怒
如堅維京謫戍允成納陞降級調外惟元覈得
免四川巡撫都御史王繼光以播事罷然上
命兵部侍郎邢玠提督川貴相機勦撫二月輔

臣王錫爵請會議冊典不允復請面陳冊儲事
宜上諭昨卿懇請召對具悉忠懇朕非不從
卿言因見大小諸臣紛疑訕不知是何人主
使朕耻為臣下挾制謗祖蔑訓國體何在以此
未款見卿今卿又有此奏若是認錯置朕何地
朕正為卿含忍欲商量別處之法不可黨衆激
惱以辜朕意既是如此俱不必封少俟三兩年
中再行寫無出冊立三月閑白入犯經略宋應昌檄

劉綎陳璘水陸濟師 上發同金二十萬以佐
軍興李如松襲倭將平秀嘉於龍山燒其倉粟
倭乏食遂棄王京遁還釜山 上乃諭朝鮮王
還都王京七月彗星犯紫薇垣八月萬壽節請
受朝賀不報

二十二年甲午二月皇長子出閣講學玉牒成
刑科給事中楊東明進飢民圖說三月河南巡
按御史陳登雲封進饑民所食雁羹輔臣王錫

爵八疏乞休許之八月議東裔納款尚書石星
力主之詔小西飛入朝決計諸臣面議要以三
事一勒倭盡歸巢一既封不與貢一誓毋再犯
朝鮮乃定封議命臨淮勲衛李宗城充正使副
以都指揮楊方亨同沈惟敬往

二十三年乙未正月議封閉白禮部議日本有
王更封閉白不便或即以所居島封之上准
封日本王號給金印行長以下授都督僉事四

月撫督邢玠至蜀以檄宣上威德招應龍來
待以不死重慶太守王士琦單騎往松坎應龍
果面縛請死罪膝行前席叩頭流血請得執罪
人齎贖鍰庭中總督以聞上可其奏加邢
玠右都御史婦朝太守王士琦陞川東兵備使
彈治之七月復建文皇帝年號

二十四年丙申正月東封使李宗城至對馬島
太守義智進美女行帳宗城留戀無意渡海復

誑以倭裔兇悍謀刺使臣宗城惧棄璽書奔慶
州副使楊方亨聞於朝乃改方亨為正使惟敬
副之立限渡海三月乾清坤寧兩宮灾六月楊
應龍復叛連破餘慶州塘二司及興隆偏鎮都
司各衛七月仁聖皇太后崩九月楊方亨沈惟
敬奉冊如日本平秀吉郊迎受封朝鮮王遣使
致賀秀吉怒其以卑官微物來賀明屬欺凌奏
聞慶分事遂中變十二月遣太監張忠往山西

曹全往浙東趙欵往陝西及河南畿內各開礦
詔採木於四川廢吏部大遷河決黃涸口議濬
沂河以濟徐邳運道砌埽仁堤擁護陵寢

二十五年丁酉正月石星請自往朝鮮諭兩國
就盟退兵不許二月東封使楊方亨歸直陳封
事始末并上石星私書因叅惟敬辱國及星彌
逢罪狀命逮石星惟敬以邢玠為總制麻貴為
備倭大將軍楊鎬為經畧楊汝南丁應泰為贊

畫刑部侍郎呂坤䟽陳天下安危言織造採木
開礦皇店之害不報三月楊應龍流劫江津縣
及南川五月倭倭將軍麻貴抵遼陽望鴨綠東
發經畧邢玠䟽請募兵川浙并調薊遼宣大山
陝兵福建吳淞水兵六月倭出釜山逼梁山熊
川沈惟敬率兵二萬出入釜山與倭合邢玠以
計縻之授意楊元襲執惟敬而倭之嚮導始絕
七月泰山崩裂一里餘皇極三殿災下詔戒勵

群臣并下罪己詔八月京師地震山西河津等縣池塘水溢十一月經畧渡鴨綠江二十九日抵王京所調宣大建浙諸路兵具集探倭屯蔚山游擊擺寨以輕騎誘倭入伏敗之倭盡奔島山游擊茅國器統浙兵先登又連破之倭堅壁不出楊鎬分兵圍十日倭嚙絰克饑檄行長援救行長以銃倭三千救之虛張聲勢鎬聞報即倉皇撤兵倭襲兩協棄輜重走贊畫丁應泰勅

楊鎬喪師黨欺 上罷鎬以大學士張位揭薦
楊鎬併勒致仕

二十六年戊戌正月東征經畧邢玠以前役缺
水兵無功乃益募兵江南請海運為持久計二
月都督陳璘以廣兵劉綎以川兵鄧子龍以浙
直兵先後至詔以天津巡撫萬世德代楊鎬經
理朝鮮邢玠分三協為水陸四路相機進勦四
月遼東告警總兵李如松襲之死于陣詔李如

梅自朝鮮馳還代之贈如松寧遠伯加少保謚
忠烈五月科臣戴士衡指呂坤閏範圍說上言
莞措之形已分語侵鄭貴妃知縣樊玉衡援引
歷代帝王嫡庶廢立之事以為鑒戒名曰憂危
竑議戚臣鄭承恩疏辨并奏士衡假造偽書中
傷善類目為二衡以激聖怒欲并殺張位宮嬪
有強諫者上意釋二臣皆謫戍六月差內監
李敬採珠廣東九月東征將士分道進兵劉綎

偏行長營陳璘舟師協堵麻貴抵蔚山董一元
進取晉州各有斬獲倭退保泗川老營十一月
福建都御史金學曾報平秀吉七月九日病死
各倭皆有歸志宜急擊勿失十七日五鼓清正
先走麻貴遂入島山西浦劉綎陳璘等四下截
殺倭道歸錦山盡殲之捷聞上發帑金十萬
兩犒賞勅給事楊應文勘東征功次楊應龍統
苗兵大掠貴州洪頭高坪新村諸屯已又侵湖

廣四十八屯執原奏讐民米世臣父鑒及羅承
思家屬慘戮以殉貴州巡撫都御史江東之疏
請防禦安南進代身金人俯伏鐫其背曰安南
黎氏世孫黎惟澤不得蒲伏天門恭進代身金
人悔罪乞恩二十五个字

二十七年己亥二月貴州巡撫都御史江東之
令都司楊國柱帥兵三千襲應龍應龍迎敵於
飛練堡國柱死師盡殲事聞江東之坐浪戰罷

以郭子章代而四川巡撫都御史譚希思改總督時起前御史李化龍兼兵部侍郎節制川湖貴三省兵事決意進勦命東征將帥劉綎麻貴陳璘量一元回兵南征四月十八日畝俘平秀政平正成並梟磔傳示几邊五月總督郭子章至蜀請設標兵檄總兵萬鰲自松潘移重慶并調集鎮雄永寧各漢土兵設防六月應龍犯綦江游擊房嘉寵戰歿綦江陷上追褫兩省巡

撫譚希恩江東之各為民緹騎逮兵備副使王
貽德賜劔懸賞嚴旨進勅七月給事中楊應文
叙東征功次首陳璘次劉綎又次麻貴而董一
元始破三寨終掃諸巢功亦難泯經畧邢玠等
陞賞有差八月陝西狄道縣城東五里地名毛
冢坡山忽崩裂百餘丈冲成一池山南平地湧
出大小山五座山未崩前每夜火光四出有聲
如雷又地遂近常聞鼓樂之聲九月太白經天

十月劉綎統兵至蜀總督郭子章為諭苗傑言
招慰賊黨

二十八年庚子二月朔大集文武於重慶兵分
八路斬關而入劉綎戰九盤山連破上月二城
吳廣燒二關奪三山八路兵登固破大城應龍
闔室自焚吳廣急覓屍出焰中生獲其子朝棟
弟兆龍等百餘人檻至京師四月武昌人千餘
集撫按門控稅監陳奉之毒害遂擁入奉署焚

燬一空五月南京守備太監查六安州礦有無
狀知府具地圖上言六安有礦高皇帝恐人
盜採傷皇陵來脉故六合衛官特重巡山之任
不敢妄議開取詔允之八月撤回朝鮮留守兵
將鄖陽樓鐘自鳴十月戚臣鄭國泰疏請皇子
先冠婚後冊立科臣王士昌糾之都給事王德
完舉漢文帝慎夫人事請薦厚中宮上震怒
廷杖一百為民十二月獻俘闕下剋應龍屍磔

朝棟兆龍等于市梟示各商分應龍地為二郡
屬蜀省以遵義屬黔者曰平越

二十九年辛丑二月京師地震少監馬堂解進
大西洋商人利瑪竇所貢方物六月武昌民復
變圍稅監陳奉，逃匿楚王府執委官六人投
之江有旨謫知府王禹穀知縣鄒光弼為民蘇
州稅監委官橫行飢民葛成倡義毆殺委官七
人身自投獄冬十月冊立元子為皇太子恭上

慈聖太后徽號群臣表賀存問在籍閣臣申時
行王錫爵手勅冊立元子諭知之

三十年壬寅二月冊皇太子妃郭氏熒惑入太
微閤二月禮科給事中張問達奏邪士李贄立
言乖僻舉止恠異所著藏書焚書惑世誣民有
旨逮下詔獄火其著書贄死於獄三月吏科給
事中曹于汴劾奏邢玠經畧播州苟且卒事經
畧朝鮮掩敗支吾欺君悞國輿論快之內使辱

侍郎敖文楨於宣武門詔司禮查治陝西黃河
竭流二十四日六月稅監潘相毆辱江西宗室
九月辛巳夜流星數百出參宿入天苑十月壬
辰夜南京星隕如雷丙申孝陵災十一月內官
奏山西煤窰每年變價五千兩有旨開取

三十一年癸卯正月遣給事中夏子暘行人崔
德冊封琉球十二月有投匿名書于各署大約
言鄭貴妃欲危太子事題曰續憂危竝議輔臣

一貫請嚴行逮捕 上震怒召皇太子慰安之
太子泣 上亦泣隨令內監以慰安太子語諭
內閣時沈一貫方以楚宗事恨郭正域疑妖書
屬正域為之下令大索緹騎四出給事錢夢皋
直指正域且及輔臣鯉發卒圍正域并捕其僕
隸乳媪下詔獄考訊無所得長安無敢偶語者
吳江人沈令譽以疑似捕治詞連卽卽于王立
王士驥皆咬片并捕僧達觀下獄亦被五刑死

錦衣周嘉慶遭遘閹門慘掠獄久不成最後得
繳生光者下獄拷掠皮肉俱盡禮部侍郎李廷
机及趙岳卿告輔臣朱賡謂即此可具獄賡勸
一貫如机言刑部尚書蕭大亨必欲窮究之御
史沈裕力持具獄上命磔生光事遂得解
三十二年甲辰正月叙播功李化龍加少保郭
子章都御史并尚書田樂蕭大亨各蔭子世錦
衣劉綬陳璘等各陞賞有差三月山東巡撫都

御史黃克縝奏稅府太監委官解銀于路詭稱
被劫累地方賠償請通行申飭五月兩廣總督
戴耀極言中官珠珠之害初粵中香山澳九商
貿易番舶所艤漸乃築城聚室儼然立一番主
交構中官流毒殊甚七月連日大雨都城崩壞
兵部武選司主事徐鑾上言弭災是意請收回
礦使戶部尚書趙士卿諫言蒼生業爛已極天
心示警特嚴礦稅韶璫侍從發掘墳墓奸淫子

女侮官虐民貽禍慘酷俱不報河決蘇家莊水
滄豐沛十月瓊州生黎以香易二斗巡兵奪干
黎人憤擊殺數人去叅將倖功率衆掩之大敗
督府遣師又敗後調數萬人擊之黎人走險深
入得老弱首以捷報

三十三年乙丑正月考察京官時主察當屬吏
部侍郎楊時喬輔臣沈一貫畏其方嚴請以兵
部尚書蕭大亨主筆徐觀瀾以不及降時論不

平給事中錢夢皋當外補特旨留用卽中劉元
珍御史朱五弼主事龐時雍後先論一貫權奸
誤國俱謫外九月京師地震十一月皇元孫生
上皇太后徽號太子生母恭妃王氏為貴妃十
二月罷開礦內外官回京泰州天鳴是年秋鎮
江華山忽裂下視昏黑南京教場夜隕星或墮
地化灰或自空中墜地有聲尋覓無跡

三十四年丙午正月內官楊崇在雲南殛吾軍

民軍官賀世勛韓光大糾衆燬其第殺之上
聞大怒輔臣朱賢奏曰陛下無以一人改變動
一方後數日傳旨首事者正法中使罷不復遣
乃捕世勛於獄二月倭酋原家康代平秀吉為
王盡誅其大臣移秀吉子秀賴于大板八月御
史、學遷請閣臣兼用外臣十月兵科給事中
宋一韓以棄地陷齒叅劾李成梁十一月南京
妖賊劉天叙聚衆千餘約冬至百官謁孝陵伏

兵陵上縛之據城僭號事露禽獲四十九人獄
成磔一斬一餘悉充戍

三十五年丁未二月京城守門內官毆殺泰興
知縣三月雲南巡撫都御史陳用賓昏貪虐下
土人鄭舉誘阿克謀復土官糾衆裔目同時起
兵殺指揮金守仁執推官白明通劫庫放獄屠
戮甚慘閏六月京師大水詔發銀米賑濟七月
稅使梁永在陝西橫甚怒縣令滿朝荐和抗上

疏遠治舉朝論救不聽尋中旨撤回十二月朝
鮮國王李肱殂

三十六年戊申三月起劉綎雲南總兵討阿克
主事鄭振先疏劾輔臣朱賡十二罪降三級調
外遼東前屯軍變欲殺稅監高淮不果旋有旨
撤回回京朝鮮國王妃金氏請立其次子光海
君李瑄詔議之卒如其請五月草陳用賓職逮
京聽勘以薛夢雷代南京天鳴聲如濤鐸旬餘

乃止。貴州苗仲亂，九月，宰審入犯，開原叅將李如楠按兵不出。湖廣巡撫都御史張問達疏災民危困，上罷稅科銀兩，未解者留，脩採木又念浙西水災，留發淮鹽銀五萬兩，賑濟十一月。又詔留稅銀五萬兩，賑濟蘇松常鎮四府。又發鹽課儀真稅銀共十五萬兩，賑濟浙江杭嘉湖三府。補贈陳猷章謚文恭，胡居仁謚文敬。

三十七年己酉正月，北鹵在邊，請賞民間訛傳。

警至街市喧擾安定德勝二門百姓爭入城避
難九門盡閉二月吏部叅糾擅去諸臣時工科
給事中孫善繼挂冠長往劉道隆繼之顧天峻
等出都尚在近郊議處有差五月吏部尚書孫
丕揚受事兩月所推上內外大僚疏揭一槩不
報春夏二季選過各官以吏科無印官不得領
憑哀號于長安道者數百人丕揚因上疏乞休
不許命發餉募兵以援遼左是年薊鎮地陷遼

東地震江西福建同日大水淹死人民以十餘
萬計山西大旱甘肅地震如雷搖倒邊牆一千
一百餘丈壓死軍民八百餘人城垣衙舍毀壞
無算山東旱蝗畿南真定諸處大旱赤地千里
三十八年庚戌三月京師風霾異常又日久不
雨苗麥槁焦四月初二日戌時正陽門樓災聖
諭內閣朕昨承聖母傳諭自春至今旱魃為災
小民飢饉欽降銀十萬兩賑濟務使得沾是惠

以仰體聖母憫恤元、至意又諭內閣朕見聖
母頒降帑銀賑濟朕將累年御前積餘及新到
折直稅銀共五萬兩又諭令中宮等各出費剗
一并給發且朕欲發米數萬石以救畿輔災民
卿可詳議來行

三十九年辛亥四月十九日怡神殿災輔臣葉
向高請畱北直山東山西河南稅銀一半令地
方官多方賑恤五月京師大水長安門一帶皆

成長河水深六尺輿馬不能行九月皇太子生
母貴妃王氏薨秘不外傳越四月閹臣為請乃
宣十月女直請遵諭願減車價入貢及還張其
哈喇伯子即前李成梁所棄地也科議請釋建
州為外懼姑置侵地先許貢敕寧東方詔報可
四十年壬子二月吏部尚書孫丕揚挂冠出都
六月副都御史許弘綱開列臺五缺乏各差繁
急具揭內閣七月蒙古忠順夫人死撫臣言其

納貢四十年最稱恭順宜加褒卹以勸九月內
使群駭駘馬冉興讓于大朝門外與讓及教習
官賈之河蘇疏辨奏御史耿鳴雷亦言國體凌
裔已極皆不報興讓置冠帶長安左門而逃東
廠奏聞上大怒差錦衣衛官尋訪奪興讓父
官三遣官諭輔臣李廷机入閣廷机陛辭出都
門十一月吏部尚書趙煥疏稱四川建昌裔課
作亂乞速點巡差以靖地方十二月礼科范濟

世奏請皇太子代行祫祭禮

四十一年癸丑正月群臣合詞請福王之國詔
以明春舉行七月武弁王日乾訐奏奸人孔學
與姜內相莊上插盟請妖人王三詔至家呪咀
太子又刻木為太后皇上像釘其目又約趙思
聖在東宮侍衛帶刀行刺語多涉貴妃福王輔
臣葉向高語通政具奏疏與日乾疏並上而密
揭奸徒所為大類往年妖書但妖書匿名今兩

造具在一鞠自明 皇上靜以處之其奸三敗
上覽日乾䟽大怒及見向高揭然霽容將揭
䟽積藏之向高復密奏速令福王之國上納之
尋以他事下日乾于獄八月釋滿朝薦王和才
卞孔時於獄十一月內官邢洪糾其黨四十餘
人於午門外凌誅御史某各御史奏聞不報皇
太子妃郭氏薨十二月延鎮三次大捷議行陞
賞

四十二年甲寅二月皇太后李氏崩頒遺詔于
天下寬釋楚宗人幽禁三月福王之國河南百
官送于郊外四月福建稅監高案率其從人突
至巡撫都御史署執都御史袁一驥及其子至
本署毆之復拘執按察司官六月堊孝定皇太
后於昭
葉向高上乞休第六十二疏得
請

四十三年乙卯五月初四日有男子張善持赤

挺突入東宮傷門者內侍集執之下法司問御
史劉廷元疏言跡涉風魔類似點猶刑部郎中
胡士相等定為風癲提平官王之采重加訐問
言有馬三道誘至龐劉二太監處語多涉鄭國
泰國泰出揭自白科臣何士晉請窮其事上
大怒召皇太子及諸皇孫詣慈寧宮太后几筵
前行告慰禮詔群臣入見御史劉光復以班浚
高聲頌聖上疑其有他言執付法司遂誅張

差於市斃龐劉二侍于內庭嚴諭內閣張差事
不得株連事遂寢于是罷王之采官補何士晉
于外次日縱釋馬三道于獄着刑部重擬劉光
復罪奪刑部侍郎張問達俸七月淮南大雨山
東旱蝗屬裔虎墩免慙犯廣寧錦義套鹵分寇
延綏孤山副總兵全軍覆沒八月京師地震
四十四年丙辰正月武臣凌應登改御史凌藻
冲于朝有旨會勘禮科余懋孳御史李養志各

以叅應登罰俸御史翟鳳翀亦以論應登訶外
四月京師大雷電雷火焚稅監張煤房屋五月
江西大水六月京師大風散若犇雷正陽門外
民房棹楔一時倒塌

四十五年丁巳正月太常寺卿林學曾等公疏
請釋累臣劉光復貴州苗仲肆虐黔中貴州巡
撫都御史張鶴鳴集兵分道勦之二月皇太子
出閣講學三月考察京官鎮撫司理刑缺官日

久無人問斷監犯多淹繫死亡家屬聚哭長安
門外七月京師恠風山西大旱山東蝗宣府天
鳴地震九月湖廣承天等處夏旱水蝗蝻蔽
天各官請賑詔停刑山東星隕天鳴地裂龍闕
江西大水十月命鼎渭准封代藩世子北鹵犯
喜峰口隆德殿災纂脩玉牒成延僖宮又災十
二月礦賊高二集聚千人流劫靈寶縣獄庫石
知縣却之已追獲伏法是歲江北鼠千萬成群

啣尾渡江而南食苗幾盡

四十六年戊午四月女直兵襲撫順執游擊李永芳城遂陷總兵張承胤全軍覆沒京師正陽門外河水三里餘赤如潰血命總督汪可受出關調度李維翰移駐遼陽起廢將李如柏總遼東兵徵廢將杜松屯山海關劉綎柴國柱等赴京以楊鎬為兵部侍郎經畧五月女直兵剋撫安山岔白家冲三堡經畧楊鎬兼程受事以二

十一日抵山海關得尅堡報䟽請就近徵調

上罷維翰令鎬蕘攝巡撫兵部請發餉二十萬
解赴各鎮調兵諭總兵杜松劉綎星馳出關給
太僕寺金六萬兩市戰馬巡撫李維翰失城喪
師革職為民七月賜死事總兵張承胤謚立祠
名旌忠愍設遼東巡撫以常寺少卿周永春往
九月東方有白氣長經天名蚩尤旗主兵象十
一月北關齋長金台失以勦女直一寨來告賜

白金二千兩綵緞二十表裡十二月特旨命鄭
養性襲其父右都督是月海州遙見白虹貫日
如日並出者三白氣直罩城上

四十七年己未正月援遼清擊佟國祚叛去二
月十八夜司天占火星逆行二十日京師風霾
晝晦黃塵四塞有頃赤光射人如血西長安坊
樓盡折其占四裔來侵 上傳諭東征將士無
飭諸邊備三月楊鎬誓師遼陽分四路進兵杜

松越五嶺關抵渾河方半渡北騎萬餘忽遮擊
衝我師為兩松血戰突圍自午至酉力竭死之
開原食事潘宗顏亦以是日力戰死劉縱獨縱
兵馬家寨口深入三百里連克十餘寨越四日
北兵詭漢裝誘墮重圍夾攻衆遂潰縱戰沒游
擊喬一琦斬大胡血戰四晝夜北兵必欲生縛
之投崖碎首而死惟清河一路李如柏以經畧
令箭撤回不見一騎而還廷議以如柏為女直

堦見疑遼東巡撫都御史周永春請都督李如
禎代將詔廷臣會議給事中李奇珍謂李氏跋
扈如禎以弟代兄出土人擁戴恐為唐李藩鎮
之漸上竟遣如禎往撤如柏侯勘諭經畧楊
鎬戴罪視事趨宣鎮總兵劉孔胤就近出關應
援上遣內臣往遼陽荐陣亡將士御史楊鶴
請卹故帥劉綎家屬及墮死事諸臣像廟食京
師以倡忠義四月女直兵縱掠鉄嶺紫河撫安

等堡宣鎮營兵鼓譟不赴調詔逮治總兵劉孔
龍五月女直兵深入撫順更以偏師躡鉄嶺撫
安堡戶科李奇珍論楊鎬李如柏逗留觀望

上命逮治候勘六月十五夜女直兵直薄開原
城立陷十九日以三萬騎圍鎮西堡潘鐵奔潰
上乃超摧熊廷弼僉都御史兼兵部侍郎代楊
鎬經畧廷弼疏請決策恢復開原上賜劍令
刻期從事廷弼單騎就道改差御史張銓巡按

遼東遣給事中姚宗文查閱援遼兵馬二十五
日女直兵從三岔堡入攻鐵嶺城陷八月二日
熊廷弼受代翌日入遼陽斬陣逃將擊劉遇節
等設壇躬祭撫清開鐵死事軍民分兵布置要
害上度廷弼已交代蒞事十三日遣緹騎逮
治楊鎬二十一日女直兵直抵金台失寨自寅
迄午旋陷隨攻白羊骨寨應時火_是關相繼淪沒
上以遼數告急超擢徐光啟以少詹事兼河南

道御史專練京兵予總督汪可受回藉經畧熊
廷弼疏稱瀋陽空城難守遼陽用集兵力上
諭酌量緩急務保孤城過其深入十一月二十
一日己亥日生暈兩耳及黑氣二道芒色甚異
司天失占

四十八年庚申正月釋御史劉光復為民三月
十七日遼陽火藥局焚燒闔城驚擾兵部得報
張皇分布京師防守四月大行皇后崩六月十

二日女直兵乘經畧關邊離遼陽以萬騎繇撫
順關入萬騎繇東州堡入混至潭河總兵賀世
賢柴國柱設防瀋陽却之上特發同金三十
萬兩犒賞遼軍七月十五日丙申上疾大漸
召英國公張惟賢大學士方從哲尚書周嘉謨
李如華黃嘉善張問達黃克纘侍郎孫如游入
見于弘德殿諸臣候安畢嘉謨以用人請上
俞允之上問遼事如何嘉善對曰臣當戮力

料理即日盪平 上領之諸臣叩首出即日

上崩上尊號曰顯皇帝廟號神宗葬定陵

石匱書曰神宗冲年嗣位英明果斷有江陵輔
之其治績不減嘉隆迨二十年後沒居不出百
事業挫養成一骹骹之疾且久貪嚙無厭礦稅
內使四出虐民辟如養癰特未潰耳故戊午前
後地裂山崩人妖天災更不勝書蓋我明之亡
徵已見之萬曆末季矣乃世以其靜居無事稱

為福主則世豈有一日萬幾之主可僅：以無

曰福也哉